



JNU-UNPAZ

JURNAL NASIONAL UNIVERSIDADE DA PAZ



**ANÁLIZA KONA-BA BENEFÍSIU HUSI DESENTRALIZASAUN BA
IMPLEMENTASAUN PROGRAMA GOVERNUN IHA SOSIEDADE BAZEIA
BA DEKRETU LEI NO.3/2016**

- 1. Albertina Cardoso, Faculdade Direitu, Universidade da Paz, Timor-Leste**
 - 2. Francisco Amaral da Silva, SH, MH, QIA, Dosente Fakuldade de Diretu, Universidade da Paz, Timor Leste.**
 - 3. Januario R. da Silva, Lic.Dir., M.D. Dosente Fakuldade de Diretu, Universidade da Paz, Timor Leste.**
-

ABSTRATU

Prinsípiu Desentralizasaun katak, fahe malu podér hodi kria ka foti desizaun iha organizasaun ne'ebé báziku liu, hodi eleva partisipasaun autoridade lokal nian iha prosesu dezvoltamentu iha nivel Munisípal, nune'e mos hodi hakmaan servisu husi Governu sentral. Teorikamente desentralizasaun katak, hanesan prinsípiu nune'e mos esforsu ida hodi delega podér entre Governu sentral (Nasional) ba Governu lokal (Munisípiu). Ho nune'e ezistensia husi dekretu lei no.3/2016 kona-ba Estatu husi Administrasoens Munisípais, Autoridades Munisípais no Grupu Tékniku ba Desentralizasaun Administrativa hodi komplementa ba Konstituisaun RDTL nia artigu 5^o ne'ebé previstu kona-ba Desentralizasaun.

Iha kontekstu Timor-Leste, Desentralizasaun nu'udar prinsípiu ne'ebé Estadu no Governu Timor-Leste opta atu hodi garante nia funksionamentu administrasaun públika nune'e mos atu hodi habadak sistema brukratizasaun iha país ne'e. Prosesu implementa desentralizasaun ligadu ho dekretu lei no.3/2016 ne'e atribui ona kompetensias lubuk ida ba Administrasoens no mos Autoridades Munisípais atu hodi hala'o sira nia kna'ar tuir ida-idak nia diresaun servisu nian.

Liafuan save : Implementasaun Desentralizasa



JNU-UNPAZ

JURNAL NASIONAL UNIVERSIDADE DA PAZ



**ANÁLIZA KONA-BA BENEFÍSIU HUSI DESENTRALIZASAUN BA
IMPLEMENTASAUN PROGRAMA GOVERNU IHA SOSIEDADE BAZEIA
BA DEKRETU LEI NO.3/2016**

- 1. Albertina Cardoso, Faculdade de Direito, Universidade da Paz, Timor-Leste**
 - 2. Francisco Amaral da Silva, SH., MH., QIA, Docente de Direito, Universidade da Paz, Timor Leste.**
 - 3. Januario R. da Silva, Lic.Dir., M.D. Docente de Direito, Universidade da Paz, Timor Leste.**
-

ABSTRACT

Principle Decentralization mean, the separation of power to make or to take desition in organization which is very basic, to raise the participation of local authorityin process of development started in district and also to makes easier Goverment centre's work . Theoretically decentralization means, like a principle and also effort to delegation the power between the Goverment centre (National) to Local Goverment (District), that's why the existence of decret law no.3/2016 about Estatutu Administrasoens Munisípais, Autoridades Munisípais no Grupu Tékniku Interministerial ba Desentralizasaun Administrativa is to follow up Constitution RDTL article 5⁰ that explain about Decentralization.

In Timor-Leste Decentralization is a principle that the Estate and Goverment Timor-Leste use, to provide the funtion of public administration and also to minimize the biriokrasi sistem in this nation. The process of implementation the Desentralization base on decret law no.3/2016 has atribute many kompetense for administration and authority in district to do their work's in each direction.

I.Introdusaun

Exklusivamente Estadu Timor-Leste forma ho Governu sentral no Governu lokal, ida ne'e atu hatu'ur lolós prinsípiu desentralizasaun liu husi kompetensia ne'ebé Governu sentral atribui ba Governu lokal, nune'e mos atu kria organizasaun autonomia iha rejiaun sira. Papel organizasaun administrativa iha Timor-Leste ohin loron halo kontrolamentu no haburas sistema kontrola ho diak, hodi estabelese kondisaun ida ho prosperu no hakmatek, atu fo assistensia administrativu ba realizasaun prosesu desentralizasaun hodi nune'e bele kontrola diak liu tan populsaun iha Timor-Leste. Estadu Timor-Leste tenki fó kriteiru agresivu hodi bele regulariza konabá kapasidade no abilidade ne'ebé hetan husi organizasaun administrativa iha nasaun Timor-Leste, atu fó pozitivu diak ba sidadaun liu husi realizasaun fahé kbi'it administrasaun ne'ebé tuir Konstituisaun RDTL haruka. Iha kontekstu ida ne'e mos atu define katak, persija iha reprejentaun husi

Governu sentral atu hodi administra no implementa programa sira ne'ebé aranja ona husi Governu sentral ne'e rasik, no mos atu oferese dezvoltimentu ne'ebé besik liu ba povu liu husi partisipasaun Governu lokal nian. Governu lokal prinsipalmente hanesan pessoa kolektiva pública ida ne'ebé variedade husi instituisaun Governu ho nia modelu, asuntu responsaveis no funsaun ne'ebé diferente. Mensiona mós ona iha Konstituisaun RDTL nia artigu 72^o konabá Póder lokal katak “pessoa kolektiva ho territoriu ne'ebé iha orgaun reprejentativa atu organiza sidadaun nia partisipasaun hodi buka solusaun ba nia comunidade nia problema rasik no promove dezvoltimentu lokal, sem prejuiju ba estadu nia partisipasaun, maka konstituisaun póder lokal”. Governu lokal hola parte importante mos iha prosesu implementasaun política jerál Governu sentral nian no sai hanesan Governu sentral nia reprejentativa iha nivel lokal hodi responde ba kestaun ne'ebé comunidade sira infrenta.

Governasaun ida ne'ebé diak no forte hare'e husi oinsá nia iha sensibilidade hodi fornese atendementu no dezvoltimentu ba interese no nesessidade públiku, prosesu hirak ne'e foin bele mosu bainhira iha prinsipiu ba implementasaun programa jerál ida ne'ebé rigorozu, efisiente no iha kapasidade no abilidade apropriadu. Iha kontekstu ida ne'e prinsipiu governsaun ho sentidu klo'ot vertikalmente koalia konabá separasaun póder husi Governu sentral ba Governu lokal. Bazeia ba Konstituisaun artigu 5^o konabá Desentralizasaun iha número 1 hateten katak "Iha nia organizasaun territorial estadu respeita prinsipiu desentralizasaun ba administrasaun pública" eskritor intepreta katak, implementa desentralizasaun ho sentidu fundamentál oinsá atu prosesu dezvoltimentu ida ne'ebé orijin, lalais no klaru iha povu horu-hotu nia satisfasaun no konfortabilidade no mos hanesan Governu nia sistema ida hodi kria ekivalensia no neutralidade ba dezvoltimentu.

Desentralizasaun signifika katak livre ka husik husi sentral, nune'e desentralizasaun hanesan prosesu ida hodi fahe póder entre autoridade sira liu-liu konabá kria desizaun, hanesan mós konjuntu ba prosesu husi desentraliza Governu lokal atu hala'o nia knaar tuir kompetensia ne'ebé nia iha, no fó oportunidade ba póder lokal sira atu responsabiliza, jere no administra rasik sira nia Munisípiu, no ho objetivu atu lori benefisiu ba povu hodi bele reforsa kapasidade atu jere ba asuntu hirak ne'ebé relasiona ho sira nia nesessidade no ba sira nia moris lor-loron nian, no haburas iha sira dinámika foun ida iha ita nia demokrásia no sidadania ne'ebé mak ita hotu defende.

II. Enkuadramentu Teoria

2.1. Teoria Governu

Liaguan Governu iha lian Inglés bolu "Government" ne'ebé mai husi lian Latin katak; Governare, Greek, Kybernan. Ne'ebé signifika katak, diriji (mengemudikan) ka kontrolu (mengendalikan). Nu'udar elementu

datolu husi nasaun ida, Governu sai hanesan orgaun ne'ebé organiza konabá interese povu nian no mós atu realiza objetivu hirak ne'ebé nia define ona.

Tuir matenek nain **Napitulu** define katak Governu iha nia konseitu nu'udar, instituisaun ka orgaun ne'ebé hala'o knaar konabá póder Governasaun. Enkuantu Governsaun hanesan prossesu ezekusaun programa ka actividades Governu nian ne'ebé aranja iha nasaun ida.

2.2. Teoria Kompetensi

Kompetensia iha lian Inglés bolu Authority katak, direitu ne'ebé iha hodi halo asaun ka fó manda ba pessoal ruma hodi halo aksaun ruma atu hodi atinji objetivu hirak ne'ebé nia rasik define ona. Liafuan kompetensia normalmente ita hetan no rona iha direitu administrasaun estadu. Universalmente bazeia ba direitu administrasaun estadu, kompetensia nu'udar póder ne'ebé aproveitadu ba rekursu ne'ebé iha hodi atinji objetivu organizasaun nian. Kompetensi

hanesan mos karakteristika ida husi nasaun ida ne'ebé eziste no kaer póder. Póder iha kontekstu ida ne'ebé konaba relasaun entre parte ida ne'ebé fo mandatu no parte ida seluk ne'ebé simu mandatu ne'e rasik. Tuir konseptu, liafuan kompetensia nu'udar elementu ida ne'ebé iha influensia makás tuir direitu administrasaun estadu nian, tamba orgaun ida-idak bele hala'o nia dever tuir komptensia ne'ebé nia sei hetan. Kompetensi tuir Kamus Besar Bahasa Indonesia iha definisaun nu'udar póder no direitu hodi halo aksaun ruma.

Tuir matenek nain **Prajudi Atmosudirjo** define katak, kompetensia hanesan mos póder formal ida, póder ne'ebé mai husi póder legislativu ka mai husi póder ezeutivu/administrativu.

Enkuantu iha sorin seluk tuir **S.F. Marbun** hateten katak, kompetensia signifika iha kapasidade atu halo asaun direitu públiku, ka tuir termu jurídiku hanesan kapasidade atu halo asaun ruma ne'ebé fó husi lei ne'ebé vigór ona, hodi halo relasaun jurídiku.

2.3. Prinsípiu Desentralizasaun

Desentralizasaun tuir etimologia mai husi liafuan Latina ne'ebé divide ba parte rua (2), “De” husik/livre (lepas) no “Centrum” signifika katak sentru (pusat) ho nune'e desentralizasaun (Desentrum) signifika husik ka entrega husi sentral.

Desentralizasaun nu'udar fornese mentu kompetensia no responsabilidade ka bele mos nu'udar póder hodi implementa sorin balu ka funsaun hotu-hotu maneje mentu nian no administrasaun governasaun nian husi Governu sentral no nia intitu isaun sira ba nivel regional sira.

Hanesan tuir matenek nain naran **Rondinelli** hateten katak, desentralizasaun hanesan fornese planejamentu, foti desizaun no autoridade administrativa husi governu sentral ba organizasaun regional, unidade administrativa regional, organizasaun lokal, governu lokal ka organizasaun non governamentais sira.

Aleinde **Rondinelli** iha mos matenek nain **Henry Maddick** ne'ebé justifika

mos katak, desentralizasaun hanesan transfere póder husi governu sentral ba governu lokal tuir lei espesifikamente atu funsiona diak sira nia servisu.

III. Metodolozia Peskiza

Metodolozia peskiza ne'e sai parte importante tebes tamba bele fo rezultadu diak liu husi peskiza nian ne'ebé maka hetan. Metodolozia peskiza sai hanesan dalan hodi buka hatene klean liu tan ba iha situasaun ne'ebé mak akontese daudaun durante prosesu de zenvolvimentu, ho objetivu atu estuda konabá faktus ne'ebé maka atu sai hanesan problema no mos atu hala'o kontrolu sosial nune'e mós bele hatene klean liu tan konabá aselersaun prosesu de zenvolvimentu.

Tuir matenek nain **Soerjono Soekanto** esklarese katak, peskiza hanesan maneira sientífika hodi bele hetan dadus ho objetivu no sertu ba nia utiliza saun.

3.1. Tipu Peskiza

Tipu peskiza ne'ebé peskizador utiliza iha peskiza ne'e atu hatu'ur lolos

natureza husi peskiza ne'e rasik mak, peskiza jurídiku normativu.

Tuir matenek nain rua **Soerjono Soekanto** no **Sri Mamudji** sira nia pensamentu konabá definisaun peskiza jurídiku normativu. "penelitian hukum normative adalah: penelitian hukum yang dilakukan dengan cara meneliti bahan pustaka atau data sekunder belakan".

Tradusaun livre, peskiza jurídika normativu halo ho meiu ezamina liu husi material biblioteka ka dadus sekundáriu.

Iha sorin seluk **Peter Mahmud Marzuki** nia hanoin katak, peskiza jurídiku normativu hanesan prosesu ida hodi hetan normas jurídiku, prinsípiu-prinsípiu jurídiku no mos doutrina jurídiku sira hodi hatán ba kestaun lei sira ne'ebé iha.

Atu konklui de'it katak peskiza jurídiku normativu hanesan tipu ida husi peskiza ne'ebé mak peskizador uza hodi halo estudu ka peskiza konabá efeitus husi normas ka regras ne'ebé estabelese ona hodi responde

ba kestaun sira ligadu ho tópiku ne'ebé iha.

3.2. Tipu Abordajem Jurídiku

Iha peskiza jurídiku normativu eziste tipu oi-oin konabá abordajem jurídiku nian. Tuir Peter Mahmud Marzuki abordajem jurídiku eziste tipu 5 mak hanesan:

- a. Abordajem Estatuaria
- b. Abordajem Konseitual
- c. Abordajem Komparativa
- d. Abordajem de Kazu
- e. Abordajem Histórika

Husi tipu lima (5) ne'e peskizador utiliza abordajem estatuaria (the statue approach) no abordajem konseitual (conceptual approach) atu hodi buka hatene konabá lei no regras sira ligadu ho kestaun jurídiku ne'ebé peskizador atu buka hatene hodi hetan nia resposta. Tamba iha peskiza ida ne'e peskizador hare'e liu ba normas-normas jurídika ne'ebé relevansia ho obra sientífiku ne'e rasik.

3.3. Fontes Materia Direitu

Tamba peskiza ida ne'e ho nia tipu peskiza jurídiku normativu, maka peskizador uza fontes materia direitu tolu (3) hodi hatu'ur fraze no forma sira lei nian atu hodi análiza konabá benefísiu desentralizasaun nian ba implementasaun programa governu. Fontes materia direitu tolu (3) mak hanesan: Materia direitu primáriu, Materia direitu sekundáriu no Materia direitu tersiariu.

3.3.1. Materia direitu primariu

Materia direitu primariu ne'ebé eskritor uza hodi hala'o peskiza ne'e mak hanesan:

1. Konstituisaun RDTL
2. Dekretu lei no.3/2016

3.3.2. Materia direitu sekundáriu

Normalmente materia direitu sekundaria mai husi literatura sira ligadu ho tópiku refere, doutrina inklui mos pensamentu ka journal sientífiku sira nebe'é públuka ona husi etapa por etapa. Materia direitu sekundariu ne'ebé peskizador sei uza hodi halo

peskiza ba problemas sira ne'ebé peskizador prefere ona mak hanesan :

1. Livru siensia direitu
2. Jornal siensia direitu
3. Artigu sientífiku direitu
4. Matérial seminariu

3.3.3. Materia direitu tersiariu

Materia direitu tersiariu ne'ebé uza hodi dezenvolve no elabora tópiku peskiza ne'e mak hanesan:

1. Internet
2. Disionariu lian Tetun
3. Disionariu lian Indonezia

3.4. Tékniku Halibur Materia Direitu

Tékniku halibur materia hanesan meius ida hodi hetan informasaun ne'ebé persija tebes hodi alkansa objetivu husi peskiza ne'e rasik, nune'e mos atu bele rekolla materia ne'ebé maka bele suficiente atu hodi resposta ba problemas ka kestoens ligadu ho tópiku ne'ebé iha.

Tékniku ne'ebé eskritor uza hodi halibur dados sira mak hanesan :

1. Estudu dokumentu sira
2. Média sira
3. Internet.

3.5. Técnica Analiza Materia Direitu

Técnica análise material direitu hanesan mekanizmu ida hodi halo análise ba kazu ka problemas ne'ebé peskizador prefere ona ligadu ho tópiku ne'ebé iha. Análiza materia direitu hanesan parte importante ida mos atu hafanuun no motiva peskizador hodi halo análise klean liu tan konabá rezultadu husi peskiza nian, depois peskizador halibur hotu informasoens no referensia ne'ebé iha, persija tan etapa ida ne'ebé importante hodi análise atu bele hetan argumentasaun ne'ebé ikus hodi hata'an ba problema ne'ebé iha. Tuir mai eziste sistema tolu (3) konabá análise material direitu nian mak hanesan:

1. Técnica análise deskriptiva

2. Técnica análise komparativa
3. Técnica análise argumentativa

Técnica análise materia direitu ne'ebé peskizador utiliza mak técnicas análise deskriptivu ho razaun atu halo diskripsaun ka análise relasiona ho implementasaun husi programa Governu nian liu husi prinsípiu desentralizasaun.

IV. Explanasaun Ba Problema Primeiru.

4.1. Implementa programa Governu nian liu husi desentralizasaun bazeia ba dekretu lei no.3/2016

4.1.1. Ezistensia dekretu lei no.3/2016

Séstu (VI) Governu konstituisional liu husi reuniaaun conseillu Ministru iha loron 19 fulan Janeiru tinan 2016 aprova dekretu lei no.3/2016 konabá “Estatu Administrasoens Munisípais, Autoridades Munisípais no Grupu técnica Interministerial ba desentralizasaun administrativa” hafoin promulga husi Prezidenti da

República iha loron 11 fulan Marsu tinan 2016.

Liu husi baze fundamental Konstituisaun RDTL nia artigu 5^o (Desentralizasaun) no artigu 72^o (Póder lokal) mak sai hanesan matadalan hodi hamosu dekretu lei ne'e. Ezistensia husi dekretu lei ne'e nian ho sentidu atu intensifika esforsu husi preparasaun konabá estabelesimentu ba orgaun no servisu servisu póder lokal nian no mós prosede hodi reforma administrasoens munisípais.

Enkuantu artigu 1^o husi dekretu lei ne'e nian define katak, prezente dekretu lei ne'e nian hodi estabelese prinsípius no normas konabá organizasaun, kompetensia no mos funsionamentu administrasoens munisípais no autoridades munisípais nian. Nune'e fó dalan ba póder lokal sira hodi partisipa direita atu hodi jere no hala'o dezvoltamentu ba ida-idak nia munisípiu rasik. Servisu ida ne'e integradu iha âmbito Estadu nia administrasaun direita, no dependensia ministro responsavel husi

administrasaun estatal hodi hare'e ba iha modelu respetivu organizasional atu evolui konabá forma iha parte ida hodi asegura prestasaun ida ne'ebé mais efetiva, efisiente no ekitativa ba bens no servisu públikus ba iha populasaun lokal sira, no iha parte seluk mós kria utilizasaun ida ne'e mais rigoroza, rasional no efisiente ba iha rekursu umanu, materias no finanseirus.

Reforma orgânica husi servisu administrasaun lokal Estadu nian ne'ebé mak introdus husi prezente dekretu lei ne'e nian katak, permite hodi asegura imediatu populasaun nia asesu independentemente ba iha fatin/area ne'ebé sira hela no ba bens nune'e mos servisu públikus báziku sira, tantu husi introdusaun sistema sira, prosesu no prosedimentu konabá jestaun governasaun demokrátika lokal nian iha tinan barak, atraves husi aksaun prátika no konkreta, fortaleseraun husi orgaun sira, servisu no rekursus umanus ba administrasaun lokal estadu nian liu husi forma progresivamente adkuirida husi

kapasidade no mos kondisoens nessesarius sira gradualmente autonomizarem husi estadu ne'ebé estabelese husi orgaun no mos servisu póder lokal nian. Prinsípalmente ezistencia dekretu lei nian, fó ona kompetensia lubuk ida ba administrasoens no mos autoridades munisípal sira hodi hala'o sira nia knaar.

4.1.2. Prosesu implementa programa Governu tuir dekretu lei no.3/2016.

Iha prosesu ba implementasaun programa sira haktuir dekrertu lei no.3/2016 ne'e nian, oinsá mak atu fahe kbi'it administrasaun públika ne'e ba iha kraik, atu desentraliza Governu sentral nia kompetensia no servisu administrativa deskonsentradamente ba iha nivel munisípal sira. Enkuantu Governu Timor-Leste komesa hetan ona konsediz esforsu balun, ne'ebé oinsá bele halao ona delegasaun kompetensia, tuir dekretu lei no.3/2016 konsege delega ona kompetensia operasionais 12 no mós kompetensias instrumentais 7 ba iha munisípiu sira

hotu. Liga ba artigu 5^o husi presente dekretu lei nian ne'ebé defini katak, administrasoens munisípais no autoridades munisípais nu'udar servisu husi administrasaun lokal estadu nian ne'ebé mak iha hodi asegura realizasaun ba funsaun administrativus estadu nian iha nivel munisípius no mós iha nivel postu admnistrativu ne'ebé mak depende hierarkia no organikamente husi membru governu nian ne'ebé mak responsavel husi administrasaun estatal.

Ho nune'e prosesu ne'ebé lao ligadu ho desentralizasaun bazeia ba dekretu lei no.3/2016 fó kompetensia ba administrasoens munisípais no mos autoridades munisípais atu halao ida-idak nia knaar tuir direasaun servisu munisípal ida-idak nian bazeia ba kompetensia ne'ebé mak previstu ona iha dekretu lei refere.

Liu husi kompetensia ne'ebé fó ka delega ona husi dekretu lei ne'e fó ona espasu legal ida ba administrasoens no mós autoridades munisípais sira hodi prepara no aranja sira nia planu no mós actividades operacional rasik para

depois tau iha planu asaun anual hodi bele servisu bazeia ba nessesidade ne'ebé mak iha. Hare'e fali kompetensia sira ne'ebé administrasoens no autoridades munisipais sira hetan ona husi dekretu lei ne'e, bele dehan katak prosesu sira ligadu ho implementasaun programa Governu nian liu política descentralizasaun ho existencia Dekretu lei no.3/2016 ne'e mais ou menus bele hakma'an ona servisu sira husi Governu sentral nian nune'e mos fó ona oportunidade ba autoridade lokal sira hodi partisipa ih prosesu dezvoltamentu iha ida-dak nia munisipiu rasik.

Maske nune'e sei iha problema ka obstáskulu lubuk ida ne'ebé administrasoens no autoridade munisipais sira infrenta ba iha prosesu implementasaun programa sira ida husi obstáskulu sira ne'e mak, ligadu ho rekursus umanus ne'ebé mak la suficiente no mos espasu ba edifisiu ne'ebé la to'o ba direasaun servisu ida-idak hodi hala'o sira nia kna'ar.Liga fila fali ba konteúdu husi presente

Dekretu Lei ne'e nian katak prokura hodi introduz estatejia sira ba estatejia sira ba tranzisaun gradual husi servisu administrasaun munisipais no mós autoridades munisipais sira atu esfera ba poder lokal através sei liu husi faze fundamentais tolu (3) mak hanesan; faze deskonsentrasaun administrativa katak estabelese servisu administrativus iha âmbito administrasaun direita estadu nian, dotadus ba estrutura organikás, sistema administrativus no rekursus umanus, materiais no finanseiru hodi asegura prestasaun ida ne'ebé mak koalifikada ba bens no mós servisu públikus.faze ba descentralizasaun administrativa intituisional durante servisu administrasau munisipais no mós autoridades munisipais trasitam ba esfera husi administarsaun direita ba administrasaun indireita pasandu hodi asegura prestasaun ba bens no servisu públiku no lokais sujeitas apenas ba superintendencia ba membru Governu. No ikus liu maka faze descentralizasaun adminisrativa territorial durante servisu administrasaun munisipais no autoridade munisipais tranzitam ba

esfera administrasaun atómomia ne'ebé mak dependentes husi orgaun represntativus póder lokal.

Aleinde Dekretu Lei no.3/2016 ne'ebé maka hetan ona alterasaun ba dala haat (4) ne'e,agra dadaun Governu Timor-Leste mós iha planu no prosesu implementasaun Lei no.23/2021 konabá póder lokal desentralizasaun administrativa hodi fó kompetensia livre mente ba poder lokal ho sira nia munisípiu hodi sai hanesan autoridade autonomia.

V. Finalidade

5.1. Konkluzaan

Ligadu ho rezultadu peskiza ne'ebé hakerek nain esklarese ona iha obra sientífiku ida ne'e hakerek nain halo nia konkluzaan katak, prinsípiu desentralizasaun mós hola parte importante ida hodi garante boa goverasaun ida liu-liu ligadu ho administrasaun públika.

1. Liu husi prinsípiu desentralizasaun ne'ebé eziste tamba prevê ona iha Konstituisaun RDTL nia artigu 5⁰ katak Estadu Timor-Leste respeita atu

fahe kbi'it administrasaun públika nian, aleinde ida ne'e Konstituisaun mós prevê no mensiona iha nia artigu 72⁰ konabá Podér lokal katak, sei hari'i kbi'it lokal ho ema ne'ebé koletivu iha rai laran ne'ebé iha orgaun representativu, ho kna'ar atu organiza partisipasaun sidadaun ida-idak nian konabá solusaun problema rasik iha sira nia comunidade no atu promove dezvoltimentu lokal, no la afeta partisipasaun estadu nian.

Ho nune'e Governu hanesan orgaun superior administrasaun públika nian iha dever no kompetensia tomak hodi fahe nia kbi'it balun ba podér lokal sira atu hola parte ba kriasaun no implementasaun ba programa sira atu hodi halao dezvoltimentu ida ne'ebé besik liu ba povu no garante moris prosperu ba nia povu.

2. Pôr entantu liga fali ho dekretu lei ne'ebé hakerek nain sita iha obra sientífiku ida ne'e mak dekretu lei no.3/2016 konabá Estatu Administrasoens Munisípais, Autoridades Munisípais no Grupu

tékniku Interministerial ba Desentralizasaun Administrativa.

Liu husi dekretu lei ida ne'e ho nia sentidu atu intensifika esforsu husi preparasun konabá estabesimentu ba orgauns no servisus podér lokal nian no mos prosede hodi reforma administrasoens munisípais. Nune'e mós iha artigu 4^o husi dekretu lei ne'e define katak, Administrasoens Munisípais no Autoridades Munisípais sira nu'udar administrasaun lokal estadu nian ne'ebé mak atu asegura ba realizasaun funsaun administrativa Estadu nian iha nivel Munisípiu no mós nivel postu administrativu, no nia hierarkia orgánikamente depende husi membru Governu, responsavel husi administrasaun estatal.

Ida ne'e sai hanesan baze legal ida ne'ebé fó oportunidade ba administrasoens munisípais no autoridades munisípais sira hodi hola parte no administra rasik sira nia munisípiu liu-liu hare'e ba potencia ne'ebé kada munisípiu iha para depois bele lori dezenvolvimentu ida ne'ebé besik liu ba sira nia populusaun.

Maske nune'e administrasoens munisípais no autoridades munisípais sira la livremente hala'o sira nia kna'ar maibe sei iha kontrolu husi Governu liu husi Ministeiru relevantes ne'ebé tutela konabá asuntu refere.

5.2. Rekomendasaun

Liu husi obra sientífiku ida ne'e hakerek nain hakarak hato'o hela rekomendasaun ba parte sira hanesan Governu, Administrasoens no Autoridades Munisípais sira no mós ba Faculdade Direitu Universidade da Paz (UNPAZ) nian.

1. Nu'udar estudante akadémiku ida hakarak rekomenda ba Governu hodi aselera polítika Desentralizasun ne'e ba Munisípiu hotu-hotu, tamba seidak iha lei ne'ebé fó kompetensia total ba Munisípiu sira atu hamriik hanesan autoridade autonomia ida hodi implementa rasik sira nia programa ba iha comunidade iha ida-idak nia Munisípiu. No ita hatene katak polítika ba implementasaun desentralizasaun

ne'e aranja kleur ona hahu husi IV Governu Konstituisional maibe ate adata ladauk iha nia realidade.

2. Hakarak mos atu rekomenda ba Administrasoens no Autoridades Munisipais sira katak, atu nafatin hala'o kna'ar ho responsabilidade tuir kompetensia ne'ebe dekretu lei no.3/2016 ne'e fo ona ba sira no nafatin mantein vontade no profesionalizmu atu hodi garante no hametin administrasaun ida ne'ebe diak no eficiente ba comunidade nia satisfasaun.

Ikus liu lahaluha rekomenda mos ba Faculdade Direitu Universidade da Paz nian, primeiru ba Dosente orientador sira hotu atu nafatin mantein atendumtu ida ne'ebe diak ba estudante sira hotu liu-liu estudante finalista sira iha prosesu elaborasaun proposta monografia no mos monografia nian, nune'e mos ba administrasaun fakuldade nian atu mantein profesionalizmu bainhira hala'o kna'ar ho nune'e hodi atende estudante hotu-hotu ho diak no responsavel.

BIBLIOGRAFIA

Atmosudirjo, Prajudi
Slemet, 1994, Hukum Administrasi
Negara, Jakarta: Ghalia Indonesia

Marzuki, Mahmud
Peter, 2010, Penelitian
Hukum, Jakarta: Kencana Prenada

Maddick, Henry, 1963, Democracy, Desentralization and Development,
BPFE, Yogyakarta.

Marbun, S.F. & Moh Mahfud, 1987,
Pokok-Pokok Hukum Administrasi
Negara, Liberty, Yogyakarta.

Paimin, Napitulu, 2012, Menuju
Pemerintahan Perwakilan, Pemda
Jakarta.

Rondenelli, A. Dennis, 1983, Desentralization and Development Policy
Implementation in Development,
Countries, London.

LEI SIRA:

Konstituisaun RDTL

Dekretu Lei No.3/2016